





白雪樓詩集

二卷五言古詩





白雪樓詩集卷二

五言古詩

錄別十二首

悠悠念往路離別從此長何以酬明德携手歸  
故鄉良時不須臾且復各盈觴仰視日月馳千  
載互相望浮雲難獨留游子暮彷徨綢繆踰皓  
首風波忽一方

其二

千秋一嘉遇此別安可知良時不努力賤軀欲





何爲晨風野蕭條浮雲西北馳河梁臨往路遠  
望令人悲游子自有懷悠悠當告誰

其三

長思何益會久留何益歸行人悵明發褰裳路  
徘徊嘉期能再至安辭渴與飢浮雲一相失千  
里常依依我欲往從之送子東南飛

其四

秋蘭懷芬芳依依樹前庭春華不再盛枝葉皆  
已零念昔二三子俛仰如流星羽翼一以垂邈

若隔平生徘徊顧四海誰能喻中情結交各有  
時千載一濯纓離別不在遠日月從此征長當  
爲路人獨無弟與兄尊酒可自慰願言崇令名

其五

垂疑起恩愛離別生歡娛念子非一身中懷難  
久俱握手一相失奄忽秦與胡新知自言樂山  
海日以殊行路方未央出門思故廬浮雲沒景  
光北風悲有餘褰裳復四顧徘徊當路衢結髮  
在戰場皓首爲征夫



其六

四海一黃鵠千里命其儔悲風厲胡馬躑躅鳴  
相求何況同袍友從此遠行游離別無慷慨去  
去且復留白日沒邊城回首望中州浮雲西北  
飛河漢東南流視夜常苦早寒冬正悠悠明月  
燭羅幃嚴霜切綢繆俛仰已自喻誰能不懷憂

其七

念當首徃路千里邈已臨絲竹發高堂聽我雙  
龍吟泠泠江漢流浮雲寒以陰長風激羽翼嚴  
霜摧北林慷慨有餘悲新聲愴人心游子失相  
視征夫淚不任中曲一俛仰從此無知音故鄉  
一尊酒願言常酌斟徘徊戀景光忽爲辰與參  
來者自非昔去者自非今

其八

高樓耿長夜攬衣歌且謔秋風一何悲游子不  
得驕明月照空牀羅帷自蕭蕭三星旣隅列河  
漢東南朝黃鵠正徘徊翩翩顧其曹故鄉邈千  
里慷慨命同袍浮雲日西北安知心所勞携手



在湏臾經時復漂搖

其九

河漢何皎皎衆星錯其間攬衣立前庭明月照  
苦顏悲風中夜起蕭蕭有餘寒涕淚應聲零四  
顧慘無歡往路信可懷爲樂及盛年游子不自  
愛故鄉豈難旋

其十

黃鵠難爲群游子常苦辛念當從此別中懷日  
以新清光皎明月遠望不可親高樓正蕭條徘  
徊四無入上有千里雲其下起飈塵各言還故  
鄉握手道何因

其十一

窮冬盛陰氣白日西南微征人常早寐皎月照  
我扉故鄉千餘里中夜起懷歸千星駕言邁嚴  
霜裂裳衣獨行無儔匹誰知渴與飢穹廬多悲  
風蕭蕭邊草衰身在天一隅何得不徘徊

其十二

顏色無常好春華一以零悲風蔽地來四顧何



自製樓詩集 卷三  
四  
冥冥寤言懷徃路攬衣從此興殺氣拳毛髮涕  
泣斷爲冰仰視河漢星離如水中萍景光不戀  
人游子豈遑寧夜依牛羊宿日驅駑馬行努力  
及明時安能愛其情  
又十一首  
秋風旣蕭蕭浮雲亦依依四顧但他鄉游子一  
何微駕言西北邁中道正徘徊客行無好懷萬  
事不如歸

其二

三星跂相視新月拳素光兩宮高自出雙闕遙  
相望雲霞絢河漢機杼成文章羅幃影四座華  
燭搖中堂主人前進酒彈瑟爲清商流焱激長  
夜殺氣隕嚴霜蕭蕭墮白髮翩翩曳衣裳男兒  
不懽悴誰知在他鄉

其三

北風著枯林浮雲苦多陰紅顏日就衰他鄉日  
就深別離起中夜對酒不能斟絲竹含妙伎佳  
人懷好音眄睐適君意忼慨動君心罷曲一俛



仰變爲游子吟念當事行役淚下難自禁

其四

秋風西北來蕭蕭動百草蕩子無室家悠悠在  
長道紅顏能幾時棄捐一何早對客發素書零  
涕復盈抱上言故鄉好下言故人老

其五

冉冉年欲度秋蘭采間萎蕩滌千歲情結束欲  
何爲美酒不誤人紅顏多所宜萬事自明日行  
樂此一時四座慘無言游子中心知浮雲動悠

悠故鄉難可期

其六

悲風墮白日天地何冥冥招搖彈北戶河漢條  
中庭征夫苦難夜且復命新聲芳言動君子四  
座無不清人生即滿百長此千載名豈如飲美  
酒趙女奏鳴箏忼慨盡逸響慰我飢渴情惟念  
當離別翩翩渺獨征

其七

明月促曙光衆星西北移游子工早行起問夜



白雲樓詩集卷二  
何其攬衣出門去長當渴與飢蒺藜穿我履嚴  
霜薄我肌別離矜盛年老至不自知努力事戰  
場淚下復無時

其八

浮雲滿天地蕩子欲安之努力事行役棄置以  
爲期少年盛意氣忼慨生別離  
粲粲無根蓬翻  
翻中林騅馬上不得語涕淚各纍纍君但重自  
愛遠道歸有時

其九

秋風動千里游子何翩翩早行多所懷忼慨私  
自憐嚴霜覆四野明星出高天涕淚一以下中  
道忽言旋踟躕戀徒侶不知身棄捐客從遠方  
來遺我繒綵牋故人俱白頭安得獨盛年

其十

昭昭秋素景明月涵金華清酒照朱顏中堂發  
高歌游子在外單結交常苦多別離動白頭人  
生復幾何悲風搖枯林嚴霜携女蘿新知雖云  
樂不如早還家



其十一

高樓出浮雲零露綴綺疏明月照佳人清光相  
有餘紛何下涕淚纖纖結素書願持千里心託  
此雙鯉魚尊名不可處白髮難久居豈如及盛  
年駕言歸故廬

古意七首

秋風西北起吹我游子裳浮雲從何來安知非  
故鄉蕭蕭胡馬鳴翩翩下枯桑暮色入中原飛  
蓬轉戰場往路不可懷行役自悲傷

其二

新人一何好年頗十五餘本自貴家子秦氏有  
名姝故人行采桑值我城南隅顏色各精妙手  
爪亦相如故人工紈素新人工笙竽笙竽未詎  
央紈素色已渝人生無新故夫壻自言殊

其三

嶰陰有孤竹常含千歲霜截爲雄鳴管其音中  
清商豈不在人耳世已無鳳凰新聲自一時豔  
曲亂高倡安得日相御竝坐君子堂



其四

十五漳河女出身邙鄆庭  
絲竹妙一世織手何  
泠泠清商有餘悲  
忼慨爲新聲中曲若無人  
含意已獨明知音難再遇  
紅妝日夜零奮響發浮  
雲摧耳不能聽

其五

英英天上雲不照濁水泥  
新婚日以親賤妾日  
以攜繁聲出皓齒  
妙舞生春姿縞綦難爲容  
棄如秋草萎念當羽翼垂  
依依即路岐良人無古

歡妾自中心知

其六

中天起雙闕浮雲出兩宮  
馳道挺其間甲第羅  
西東胡姬正當壚邀客過  
新豐朱脣含綠酒纖  
爪扣青銅墮髻似無意  
紹繞一何工眇睠正愁  
人流紈動春風雙雙羽  
林郎翩翩五色驄挾瑟  
上高樓調絲方未終

其七

胡鷹一何勁北風一何高  
朔方士馬地斗酒命



同袍窮冬蹙四野大獵出臨洮盪石響深谷烈  
火走平臯邊聲中夜起殺氣常蕭蕭積陰生戰  
塲白日慘不消草枯牛羊瘦雪盛狐鼠驕引領  
望交河層冰正迢迢

詠古十六首

帝作大唐歌八伯奏卿雲鐘石興麓野人聲一  
以論日月發光華爛然星具陳沈璧十二渚岱  
宗乃于裡是時闢四門穆穆咸所賓

其二

綏綏塗山狐九尾不自多我往求平定念子無  
室家明發興嶽庭乃身參洪波宗疏事則哀祝  
融揚英萃玉牒沐日月素書出江河

其三

江水一何沛薄大趣歸處朝周過故墟宮室生  
禾黍傷彼西山士採薇自相茹千載睹軼詩斯  
人乃高舉

其四

白雲出山陵乃在天一方東土旣已洽徂西聊



白雲樓詩集卷二  
十一  
倘伴虎豹自爲群鳥雀列成行惟帝立嘉命諸  
夏發其祥願言顧見女中心以翱翔刊石樹弁  
茲千載遙相望

其五

杲杲熾日羽施施掩旄旂我車旣已寫四馬亦  
孔柔射夫率原隰君子循方舟楊柳橐其鮮鹿  
豕填相求多士自允異燕樂成王猷駕言徂東  
郊出洛朝諸侯

其六

白石粲南山頽鯉麗滄浪單衣裁及骭緼縷遠  
從商夜中起飯牛任車自所將燭火辟列星上  
客爛生光疾歌一不聞何謂伯與王

其七

苑彼中林鳥拚飛不集枯齒牙一爲猾公子良  
見圖矯矯上天龍霧雨旣已敷子推獨耆乾草  
莽空號呼縣書下宮門綿山聊與娛

其八

莊王構層臺乃與雲夢鄰東延洞庭石泮陽激



白雲樓詩集卷二  
清津趙魏方幸禍况此狼虎秦諫者七十二枕  
藉以前陳時非一耕夫三楚訖無人困知沮溺  
流用即社稷臣

其九

駕言九臯澤攬彼漸水臺杲且蔽荆岑絕流曲  
池隈婉彼三楚士諫獵紆其才大雨忽盈河疾  
風西北來洪潦起滔天隕雹激以雷商梁正綏  
立僕夫行告哀孤虛無妄設熒惑諒爲災帝德  
睠荒淫欲去此徘徊

其十

文駟陳大庭膳肉宿所修群婢一以盛君子乃  
見咻孰謂彼婦口於中可優游蟪蛄遂盈耳鳳  
兮當何求斧柯不在手龜山鬱綢繆翱翔七十  
國交轍奸諸侯狄水衍其波罔濟非無舟駕言  
從吾好還轅息我陬

其十一

忽忽歲已莫大臺役方作太上美遨遊禾黍未  
能穫滯穗蒲甫田風雨殫零落相國一沾襟罷



酒不為樂

其十二

貪吏常苦富廉吏常苦貧不見孫叔敖其子行  
負薪五霸相代興主烈難為臣令名有遺封餘  
財喜没人寢丘雖言惡千載功無湮

其十三

闔閭為無道厥欲如蛇豕薦食視上國乃政從  
楚起昭王在草澤群臣不復紀使者哭秦庭七  
日未得理入郢既已甚丘隴行見蕃感茲告急

言誓彼同袍士賢臣亦多術存亡尤獨美

其十四

吳王既棲越出遊包山湖道逢一丈人邀我洞  
庭隅靈墟發深藏中有神禹書大文秘天地乃  
傳百六初金簡歆浮景玉宇回璇樞科斗不可  
辨鳥跡互盤紆精萃一以洩厭氣直國廬顧見  
二室顛三石方扶䟽

其十五

薛公得馮驩門下知者誰十日居傳舍乃問客



所爲先生惟一劍彈鋏何其悲授室締高國驅  
車出中達主人意已厭同列寧見推田文旣失  
位傾身與持危片言悟齊主復相名益垂奇士  
多侮世藏用匪可窺

其十六

中春陽和起嘉觀臨四方刻石頌功德從臣紀  
攸長上以獻泰成下威六暴強郡縣乃作始經  
緯不踰行薦號立大義昭設咸有章濯俗諒已  
美刑名非恒常鞭善出頑夫二世尋滅亡

雜興十首

伯牙負高操引曲輒入神從師蹈東海延頸四  
無人洪波盪大壑悲鳥方號群白日坐失色山  
林忽不分精氣一以變此調得其真世俗蔽聞  
見千載迥相因遺世伎始妙絕絃多苦辛自非  
鍾子期古道難具陳

其二

離朱不逆景師曠不逆風所用一以失化爲瞽  
與聾轡策出大御繩墨出巧工顧眄即千里結



何遜梅詩集卷三  
構臨層穹束手寧自其狗人道乃窮

其三

良材出大國群構集明堂構榦相支持榱桷碩  
且長飛棟鬱雲興高軒間重梁衆人稱壯麗輸  
子起彷徨柱小亦已撓朽蠹處中央迨天方晦  
陰室家羅四廂行者苦無庥居者歌慨慷風雨  
一漂搖不知僵路傍

其四

良馬躡路岐善言躡嫌疑稱樂自云早日月晷  
已馳黃金不可作美酒多所宜清風響高唱令  
德含妙辭

其五

大元秉經緯天地自生成陰陽遞消息四時相  
虛盈雷雨鼓神氣日月宣華英網緼交二儀周  
流列五行至和液甘露盛德厭撓捨唐虞其法  
象明良熙穆清垂衣御三事大治無常名

其六

翻何漢宮女紅妝鬱熒熒本自良家子十五克



白雲樓詩集卷三  
後庭是時得上意寵至身逾輕貴幸霸天下妙  
麗傾人城詔許領椒房嬪御無不驚脣如齧丹  
鉛齒如鏘玉聲一當萬乘主常含中道情絕色  
動千載旦夕誰見明美惡縣盛衰弃置視合并  
所以尹婕妤顧眄失平生

其七

詭時苦難遇直道苦不萃挈餅羸衆口繩墨矯  
群邪所以上古人工拙無常家陸沈金馬門醉  
即據地歌世久自相玩爲德一何多在群旣纍  
生孤貴亦失和首陽與柳下一龍復一蛇同流  
雖所願跡邇心則遐

其八

鴻鵠一以舉四海何悠悠局促人間世豈若遠  
行游明時不重至中懷難久留遇合成佞倖美  
女多所仇英雄旣失據片語解網繆所以孔仲  
尼舍車即于浮

其九

洞庭大張樂千乘朝崑崙在昔有行幸軒穆一



何尊樓船下河東羽衛覽西垠風起白雲飛隴  
首望中原簫鼓發哀情長馳掩回轅入齧妃女  
脣出接詞客言

其十

名馬不受羈足下有千里黃鵠不受羅羽翼就  
四海貴賤自一身出處無二軌時利適愚夫勢  
衰蹶智士祛長不握臂屨縮不截趾陸沈人間  
世悠悠日復爾

君子行

君子美百行維日服厥衷車奔不易度火滅不  
改容垢言一生口盥漱難爲工金多徒自穢重  
名撓直躬幸勿少湏臾無替功乃崇九淵可浮  
游所患溺愚蒙

古詩後十九首

并引

前有十九首故後言之猶稱古者其文則十  
九首也其文則十九首而以屬辭辟之制轡  
筴于埳中姿意於馬使不得旁出而居然有  
一息千里之勢斯王良造父所爲難爾



其一

行行萬餘里依依夢故鄉見君累長夜携手立  
彷徨寤言心尚爾忽在天一方越鳥東南飛胡  
馬鳴相望眄睐人自好棄捐人自老徘徊亦何  
益努力苦不早思君度餐飯歲月漫浩浩慷慨  
即別離故鄉勿復道

其二

搖搖車馬客依依燕趙女沾沾倚箏立交交夾  
窓語盤盤高結出颼颼中帶舉浮雲忽自歸蕩  
子漫無所天寒錦衾薄空牀難獨處

其三

白石何歷歷松栢何離離人生天地間一日不  
可知斗酒無常置良會無常期沉吟厚與薄爲  
樂無乃遲宛洛美遊戲冠帶自相隨宮闕起雲  
中第宅羅四垂王侯負貴氣佳客以盛衰君但  
視車馬攬策振其綏

其四

良會屬今日彈箏倚新聲唱苦令神傷三變不



白雲樓詩集卷二  
可盈中曲忽自置躑躅一再行欲因更促枉難  
爲聽者情人生局一世悠悠終何成要路多坎  
坷先秋慘其榮來者率如此焉知千歲名

其五

三五樓上女徙倚當雙扉紅妝妙一世誰不攬  
容輝絃歌入青雲新聲亮所稀千載爲一彈含  
意有餘哀知音難再得且復立徘徊終日不成  
曲零涕沾裳衣三歎令人老游子何時歸

其六

燭燭芙蓉花擢擢采蘭婦懷袖忽已盈馨香誰  
爲有秋草一以萎此物難獨久馳情一水間無  
因携素手

其七

搖光加孟冬北風何慘慄寒至踈衆星蟾兔亦  
早缺四時旣潛移遺迹難獨列不知空牀下蟋  
蟀安從出宛洛多故人厚者如膠漆及其據要  
路負我道非一織女無成章牽牛策不發且復  
守貧賤振翮各有日



其八

浮雲何冉冉亦在南山阿千里遠徘徊游子苦  
無家昔我同門友策馬驅高車兩宮屬眇眇冠  
帶日逶迤致身及盛時結附一何多極宴累長  
夜重闌發絃歌白露忽以零迫此蕙蘭花芳草  
隨飈塵誰能顧女蘿

其九

獨鶻西北逝逸響一何哀念當生別離欲去復  
徘徊不惜寒氣厲但傷羽翼摧我有鴛鴦綺無  
衣誰爲裁

其十

眇眇織女星當機理紈素牽牛能幾許常爲投  
杼誤紈素欲遺誰終日西北顧負輓復何時軒  
車歲云暮攬衣即河漢躑躅不得度

其十一

高樓出西北下有故鄉道浮雲蔽天起回飈響  
秋草四時更相至人生自著老傷彼遊子顏戚  
戚難獨好携手不須更棄捐一何早努力以爲



樂泣涕復盈抱

其十二

東城屬浮雲阿閣百餘尺歲暮多悲風游子衣  
裳薄四野何蕭條所遇但遺跡來者自爲今去  
者自爲昔盛年奄已衰含意將安適燕趙出名  
倡紅顏照死洛結束隨時變絃歌日相索未彈  
理懷袖若在遠行客弄指一何妙列柱一何迫  
馳情視雙燕飛入王侯宅

其十三

磊磊丘與墳鬱鬱郭北地白日松柏陰悲風四  
面至誰能黃泉下未含未伸意悠悠即長夜千  
載一以棄漫漫待明發迢迢正遙寐身世非膠  
漆豈得常相寄此物無賢愚萬歲更相致神仙  
不可知服食苦中置美酒與佳人携手行遊戲

其十四

郭北一極望徘徊安所如新墳歷歷出古墓附  
里閭薪者躑躅歌棄妾迴其車白楊日夜踈蕭  
蕭悲有餘三歲去故鄉一字無素書



白雲樓詩集卷三  
其十五

處世苦無見孤生非所憂  
高言唱同心千載一  
相求窮賤解膠漆棄置衰  
交游昔我同門友上  
書哀王侯明月皎夜光  
躑躅不得投

其十六

迢迢月旣望白露被庭中  
越女前理音燕服羅  
清宮交游自遠方文彩復  
無雙駕言出廣陵將  
以適曲江聊慄此何氣攬  
觀不可窮帷車蔽日  
下萬馬悲回風水力率已  
至神物難爲容秉意  
屬南山浩蕩惟所從上客  
變其度陳唱誰與同  
極命以成章娛樂良未終

其十七

孟冬風已厲攬衣有餘歎  
獨宿知夜長遠客知  
天寒河漢直雙闕皎若素  
與紈黃鵠從西南孤  
飛正漫漫一鳴緩中帶再  
鳴霑玉顏遊子不可  
聽令君中道還所以生別  
離慷慨亮爲難

其十八

客從洛浦至遺我合歡衾  
中有長相思緣以結



白雲樓詩集卷三  
同心芙蓉發文彩鴛鴦厲哀吟遊子正無衣天  
氣復已陰故人此屬意徘徊獨至今

其十九

皎皎羅帷月攬之有餘輝寤言守長夜依依未  
能歸故鄉無不可道路亦何爲客行各所懷誰  
知我心悲出門一以望浩蕩霑裳衣

酬皇甫虞部

青陽一何麗冉冉西南馳言念庭中樹率已萎  
華滋昔我同心友權宴及良時携手理清曲各  
謂無人知天衢多高足冠蓋自相隨所願不與  
俱朝親夕生疑含意戀明世皓首爲君期諒茲  
久識察紅顏坐盛衰

寄許殿卿

西山匿冬日北風悽以繁念茲歲方晏徘徊白  
雲垣俛首事尺牘儻石聊自存悠悠塵中心夙  
昔非所論感彼碩人情獨歌矢弗諉庶此涉時  
艱遂用安丘園路傍磬折子高足策萃軒咄喏  
金蘭客來當蹈斯言



賦得何仲默

仲默自天秀弱齡負遐矚十六遊京邑藝苑策  
高足揮毫坐華觀懷人理清曲歸來放情志日  
晏從所欲結好玩遺芳明德以相勗古道諒寡  
諧遂令傷局促

五子詩五首

王元美

元美何翩翩夙昔秉靈異京洛多冠蓋操觚各  
自媚所遇無此物識曲聽其偽大雅久沈邈時

消作者至俛仰知音稀含茲未伸意但坐奮  
響側身向天地虛名喜誤人依依千載事浮雲  
相攬持白日一高視四顧命儔匹中懷誰可致  
凌厲子長氣文章此未墜

吳明卿

吳生蕩滌士明德復何早高舉凌風翮青雲漫  
浩浩良時冠帶會斗酒弄辭藻一彈中清商下  
里難爲好知音率已稀隱几存吾道衆言紛盈  
庭膠漆各自保掩耳走消亂褰裳度潢潦罵坐



豈盡狂流俗令人老陸沈金馬門懷袖諫書草  
白日有弃捐遊子悲不造

宗子相

婉婉維楊士早歲絕人識結撰有至思先民乃  
遺則時俗徒嗷嗷此物知者得鬱鬱獨徃心百  
折江河力披覩他自媚我意安所測念茲携手  
驪榮名與令德浩蕩陰陽移吾道相終極語及  
千載事愀愀動顏色中懷誰可喻文章亦經國  
一爲麟鳳言三歎加餐食

徐子與

徐生一何俊本自青雲姿十年任天目含意多  
素辭旣聞風雅音三歎文在茲眇昧生榮名徒  
倚即前綏念爲理清曲高言倡者誰躑躅流俗  
間携手不相疑時髦滿要路各謂中心私世人  
豈同願吾道欲委蛇黃金買大藥朱顏庶可持  
物理率如此和光難獨窺

梁公實

梁生起南海負氣何倜儻北交中原士徘徊得



吾黨高名豈宿著一朝奮鴻響時俗旣淆濁振  
衣念獨往禮法難爲工局促向天壤王喬可等  
期服食理非枉引領還羅浮願言稅塵鞅俯視  
大河流逶迤浮雲上盛衰隨物化世情自鹵莽  
吾意當告誰黃金妬偃仰

二子詩二首

盧次楨

盧柎起河朔本自千金子蕩滌諸生間銷骨於  
積毀世無臨邛令焉得心尚爾深文類繆恭罪  
畧中狙喜乃繫黎陽獄十年攻一技旣出浮丘  
賦始知有株累三嘆不同時帝曰付諸理寥寥  
相如後誰能識察此

謝茂秦

謝榛吾黨彥軾軻京華陌黃金自不留朱顏亦  
已擲韋布豈盡愚咄嗟名士籍握手金閨人中  
情多所適冠蓋羅長衢染翰日相索遂令清廟  
音乃在褐衣客一出遊燕篇流俗忽復易還顧  
望鹿門矯矯青雲翮



酬元美二首

妾本秦宮女，少小揚蛾眉。早辱君王寵，朱顏驕  
自持。卷衣皆羅紈，明珠縱橫垂。頭上翠琅玕，爵  
釵珊瑚枝。盛年處深殿，容華天下知。一朝在里  
巷，遂爲生別離。此身託古歡，南山猶可移。東隣  
蕩子婦，泥沙委路岐。中心指秋日，同穴乃所期。

其二

有鳥名黃鵠，乃在琪樹柯。下來太液飲，喙喋荇  
與荷。周游視中土，少年多羅家。金衣菊爲裳，不  
受矰繳加。一舉絕四海，離哉天可摩。毛羽未摧  
類，鼎俎柰爾何。

再荅元美二首

盈盈倚蘭花，深谷何逶迤。秋風凋竒樹，隕擇以  
歲蕤。含英即蔓草，不復揚華滋。豈無王者香，結  
根非其宜。孤生感霜雪，采折中心知。幸君置懷  
袖，慰此長相思。亭亭西山柏，自茂凌寒姿。下流  
難久居，壯士多所悲。

其二



采苓首陽巔青蠅止于棘結髮奉歡宴柏舟矢  
靡慝上堂理琴瑟下堂視蚕織昵若形與影在  
遠復相憶豈不防未然萋斐成罔極愛深生百  
憂棄捐衢路側賤妾抱區區中道蒙察識琴瑟  
聽其真蚕織五文色非君膠漆心群小志亦得

郡齋同元美賦

遊子苦行役驅車自溟渤依依平生親斗酒日  
云沒秋風亦已厲蕭條衆芳歇何以贈君子徙  
倚攬明月燕婉當及時霜雪變華髮高足蔽天  
衢浮雲望雙闕令德一見疑積毀能銷骨中懷  
不復喻邈若胡與越綢繆有故人知音無倉卒  
常恐遠別離含意向明發

送元美二首

有鳳銜靈文栖栖北海湄臨流理毛羽五采以  
自竒飛如摛群星擊若朝霞披翱翔千仞岡亦  
集梧桐枝一鳴叶清廟再鳴中咸池淒風振大  
野青雲顧我悲世無伶倫耳誰爲度參差回首  
顧卍穴摧藏不可持將止帝東園恐令鷓鴣知



阿閣在萬里哀號乃見疑啁啾榆枋間燕雀相  
追隨清光蔽白日何當復來儀

其二

夙昔二三子慷慨揚奇聲文章凌先秦詞賦無  
西京零落如流星各懷飢渴情念爾策高足北  
海日以清顧眄當中原冠蓋徒縱橫明發詠蓼  
我依依戀所生悲風薊門來涕泣霑我纓解帶  
謝時人驅車薄姑城千里見大河躑躅浮雲征  
罷酒不能別蕭蕭駟馬鳴骨肉非一身意氣乃

合并景光老自愛率已識榮名

荅寄俞仲蔚二首

太乙貺漢德名駒生渥洼赤汗霑青雲長嘶振  
流沙飢斃玉山芻渴則飲其涯翹尾以躑躅駒  
駢相經過不顧游閭闔况乃服鹽車世豈無伯  
樂垂耳柰我何天子發素書使者出蹉跎駢駢  
十二閑駑馬常苦多雖有千里姿羈絆非所加

其二

鬱鬱龍門山下臨千仞谿孤桐生其間幹與浮



白雲樓詩集卷三  
三九  
雲齊湍水擊其隈迴波蕩其涯野火燔其東飛  
雪塗其西莫則止黃鵠朝則啼鷓鴣悲風從天  
來清商以淒淒伯牙不能去傾耳中自諧匠石  
空扼腕運斤路何階琴瑟和神人無乃非其懷  
結根旣已異雨露難獨垂願言俯大壑徃就長  
離棲

送李明府入奏

西北夏雲列飛蓋亦相望供帳被城隅父老皆  
扶將天子秉百度作新大朝堂椽桷曼且碩掄  
才自南鄉山河俯壯麗肅穆垂衣裳是時薰風  
至五月開未央旣奏解愠曲或和斯干章聖顏  
慰飢渴帝心簡四方冢宰上績書召見伏明光  
用等課高第視事稱維良小臣奉威靈不得施  
其長誰謂一邑輕治行乃無疆願言備侍從珥  
筆述陶唐策勲諒有期遺愛匪可忘

許殿卿郭子坤見枉林園二首

明時再嬰疾隳官此悠悠求言命沮溺二子乃  
從游田家何所有樽酒結綢繆散髮坐園中輓



白雲樓詩集卷三  
三  
轡牽寒流擊我青門瓜聊且充庶羞雨氣蕩暄  
濁披襟御南樓開軒納山色餘映一以收雲霞  
羅四隅煙火蔽林丘伏陰秀禾黍餉婦媚原疇  
西望華陽宮若見清河舟登臨信亦美曠然銷  
人愁願君愛景光多暇還相求

其二

佳客即良夜此會安可期結髮爲兄弟晤言今  
在茲層臺挺浮雲河漢宛其垂積陰濯列宿三  
五正參差前山電影亂雨勢坐已移皎月出平

陵徘徊當照誰清光澄暑氣颯若撤長帷潦水  
明樹間流飈澹萃榱零露響空林蟪蛄以鳴悲  
世路良獨難斗酒多所宜達人忌榮名千載同  
一時

杪秋同右史南山眺望

南山有幽意駕言此徘徊湖波蕩寒城四座清  
光開金天澄素景秋氣何悲哉繁陰逝白日浮  
雲間往來落木颯中林流焱激巖隈朝昏上煙  
火原隰被樓臺故鄉無滯淫世路多塵埃念我



平生歡離思壯難裁

九日集殿卿池亭分賦二首

卜幽命詞客冠蓋至如縻白雲澹蕭晨黃花媚  
新醞灑翰湖山清開樽魚鳥近零露偃池荷淒  
風攜籬槿徑回片橋出林暝寒城隱臨流濯長  
纓飄然祛塵坻

其二

寒空雀嶺秀霽野湖水濶墟落散城隅池亭入  
幽豁雲陰出水鮮石色含霜活白鳥下煙際歸  
鴻起天末返照欵長林群流亂相聒紫蟹壯可  
持濁醪美堪掇秋高吹臺興老劇文園渴佳節  
有獨醒吾生豈云達

集張使君別業

清河迅寒流金輿杳空翠秋氣下高原蒼然西  
北至返照散踈林蕭條煙景異零落復佳期茅  
茨况幽致握手平生人笑談出往事舊游數子  
盡風流吾黨備千金抵白髮一醉蒲君意

秋夜白雪樓同許右史襲茂才分韻二首



白雲樓詩集卷二  
林煙旣曳綃湖霞一披絳雞犬靜荒村蓬蒿翳  
深巷燒微見月出鐘清識霜降各稱浮白樂未  
覺呼盧戇更賦梁園雪如流華渚虹預愁還城  
邑車馬紛相撞

其二

返照入平陵白雲出西隴天清雁影澹山空嵐  
氣重三徑何蕭條高人乃接踵諸生稷下秀詞  
客梁園寵松菊有佳色琴樽亦慙懣但醉不須  
眠寒燈坐相擁

送許史得弟字

秋風一蕭條白雲自相綴翩翩爾曳裾慘慘吾  
分袂鼓楫大河流揚帆下衡衛平臺壯登眺鄒  
枚儼兄弟旣出兔園篇頗兼子虛製詞賦有知  
遇王門即恩惠

集開元寺

流陰拂層岑返照翳深谷古寺入蕭條廻巖抱  
幽獨梵影淨香臺鐘聲殷石屋絕壁棲禪誦縣  
厓下樵牧秋花雨還瘦老樹霜逾禿寒泉可瑩



心白雲况極目登臨客自佳  
搖落時何速蔬色蕩腥羶  
苔光清簡牘新詩發神秀  
舊游耿初服歸來杖屨便  
老去煙霞伏高城出睥睨  
燈火通林麓言旋轉多興  
後期此同宿



